

AKASHVANI(AIR)

RNU: KOLKATA

Bengali Text Bulletin

05-04-2026

Time: 1.40 PM

বিশেষ বিশেষ খবরঃ-

১) বরিষ্ঠ বিজেপি নেতা, প্রধানমন্ত্রী নরেন্দ্র মোদী আজ কোচবিহার থেকে দলের হয়ে পশ্চিমবঙ্গে নির্বাচনী প্রচার শুরু করবেন।

অন্যদিকে মুর্শিদাবাদে দলীয় প্রচারে অংশ নিয়েছেন তৃণমূল কংগ্রেস নেত্রী, মুখ্যমন্ত্রী মমতা ব্যানার্জী।

২) কোচবিহারের মেখলিগঞ্জ নাকা চেকিং-এর সময় একটি গাড়ি থেকে আগ্নেয়াস্ত্র ও গুলি উদ্ধার।

৩) ঝাড়খন্ড থেকে ফরাঙ্কাগামী পিকাপ ভ্যানে অঙ্গওয়াড়ি কেন্দ্রের শিশুদের জন্য পাঠানো ২২০ বস্তা খাদ্য আটক করেছে পুলিশ।

৩) ভারতের তারালি সীমান্ত অবৈধভাবে পার হওয়ার সময় দুই বাংলাদেশী নাগরিক এবং তাঁদের সাহায্যকারী দুই মহিলা গ্রেফতার।

৪) পশ্চিম বর্ধমানের দুর্গাপুরে সিটি সেন্টার সংলগ্ন এলাকায় রান্নার গ্যাসের পাইপলাইন থেকে গ্যাস লিক করায় আতঙ্ক।

৫) দক্ষিণবঙ্গে দমকা হাওয়া এবং বজ্রবিদ্যুৎ সহ বৃষ্টির সম্ভাবনা। কলকাতা ও পার্শ্ববর্তী এলাকায় আকাশ আংশিক মেঘলা।

oooooooooooooooooooooooooooo

পশ্চিমবঙ্গে বিধানসভা নির্বাচনের দিনক্ষণ এগিয়ে আসার সঙ্গে সঙ্গে জোরকদমে শুরু হয়েছে প্রচারাভিযান। বরিষ্ঠ বিজেপি নেতা, প্রধানমন্ত্রী নরেন্দ্র মোদী আজ কোচবিহার থেকে রাজ্যে দলের নির্বাচনী প্রচার শুরু করবেন। ঐতিহাসিক রাস মেলা ময়দানে এজন্য বিজয় সংকল্প সভার আয়োজন করা হয়েছে। দুপুর তিনটে নাগাদ কোচবিহার বিমানবন্দর থেকে সড়ক পথে সভাস্থলে যাবেন তিনি। সভাকে ঘিরে জোরদার করা হয়েছে নিরাপত্তা ব্যবস্থা। প্রধানমন্ত্রীর নিরাপত্তা দল এবং স্পেশাল প্রোটেশন গ্রুপ, এস পি জি-র আধিকারিকরা ইতমধ্যেই সভাস্থলে নিরাপত্তা ব্যবস্থা খতিয়ে দেখেছেন। সম্পন্ন হয়েছে সেনাবাহিনীর হেলিকপ্টারের ট্রায়াল ল্যান্ডিংও। জানা গেছে, কোচবিহার ও আলিপুরদুয়ার জেলার ১৩-টি বিধানসভা কেন্দ্রের প্রার্থীদের সমর্থনে এই জনসভার আয়োজন করা হয়েছে।

oooooooooooooooooooooooooooo

রাজ্যে বিধানসভা নির্বাচন ঘোষণার সঙ্গেই শুরু হয়েছে জোরদার প্রস্তুতি। কোচবিহার জেলাও তার ব্যতিক্রম নয়। ভোটের দিন এগিয়ে আসায়, জেলায় বাড়ছে নির্বাচনী উত্তাপ। এক নজরে দেখে নেওয়া যাক এই জেলার ভোটচিত্র। একটি প্রতিবেদন-

(ভয়েসকাস্ট - শুভেন্দু ভট্টাচার্য)

oooooooooooooooooooooooooooo

ভোটের প্রচারে মুর্শিদাবাদের সামসেরগঞ্জের সভায় আজ তৃণমূল কংগ্রেস নেত্রী মুখ্যমন্ত্রী মমতা ব্যানার্জী নির্বাচন কমিশনের ভূমিকার কড়া সমালোচনা করেন। রাজ্যের আধিকারিকদের যেভাবে বদলি করা হচ্ছে তাতে প্রশাসনিক কাজকর্ম ব্যাহত হচ্ছে বলে তার অভিযোগ।

এরসঙ্গেই তিনি জানান, ফরাক্কা থেকে মনোনয়ন প্রত্যাহার না করায় বিদায়ী বিধায়ক মনিরুল ইসলামকে দল থেকে সাসপেন্ড করা হচ্ছে।

উল্লেখ্য, ফারাক্কার বিধায়ক মনিরুল ইসলামের বদলে এবার সামশেরগঞ্জের বিধায়ক আমিরুল ইসলামকে ফারাক্কায় টিকিট দেওয়ায় ক্ষুব্ধ হয়ে গতকাল নির্দল হিসেবে মনোনয়ন জমা দেন তিনি।

মুর্শিদাবাদের জিয়াগঞ্জ-আজিমগঞ্জ সভার পর বিকেলে বহরমপুরে দলীয় প্রার্থীর সমর্থনে রোডশো করার কথা রয়েছে তৃণমূল কংগ্রেস নেত্রীর।

০০০০০০০০০০০০০০০০০০০০

কোচবিহারের মেখলিগঞ্জ থানার চ্যাংড়াবান্ধাবাহা বাইপাস এলাকায় নাকা চেকিংয়ের সময় একটি গাড়ী থেকে ৬টি দেশি আগ্নেয়াস্ত্র এবং ২০ রাউন্ড তাজা গুলি উদ্ধার হয়েছে।

এই ঘটনায় জড়িত দুই ব্যক্তি, মনিরুল ইসলাম এবং সামিম রহমান-কে গ্রেপ্তার করেছে পুলিশ। এই আগ্নেয়াস্ত্র কোথায় নিয়ে যাওয়া হচ্ছিল তা নিয়ে তদন্ত চলছে। উদ্ধার হওয়া অস্ত্র ও গুলি জেলা ক্রাইম ব্রাণ্ণের হাতে তুলে দেওয়া হয়েছে।

০০০০০০০০০০০০০০০০০০০০

মুর্শিদাবাদের ডোমকলে গত শুক্রবার রাতে প্রচুর পরিমাণে বোমা উদ্ধার হয়েছে। বিধানসভা ভোটের ঠিক আগেই হরিহরপাড়ার পর ডোমকলে এই বোমা উদ্ধারকে কেন্দ্র করে ব্যাপক আতঙ্ক ছড়িয়েছে। ডোমকল থানার আমিনাবাদ এলাকায় শুক্রবার রাতে একটি মাঠ থেকে মজুত রাখা ২৫টি বোমা উদ্ধার করে পুলিশ। গতকাল বিকেলে বম্ব স্কোয়াডের কর্মীরা সেই বোমাগুলি নিষ্ক্রিয় করেন।

গত শুক্রবার রাতেই দুটি পৃথক ঘটনায় কান্দি ও খড়গ্রাম থানা এলাকায় আগ্নেয়াস্ত্র-সহ দু'জনকে গ্রেফতার করেছে পুলিশ।

০০০০০০০০০০০০০০০০০০০০০০

মোথাবাড়ি কাণ্ডে NIA দল আজ সকালে কলকাতার বালিগঞ্জ আক্রান্ত এক বিচারকের বাড়ি গিয়ে কথা বলেন। এছাড়া মালদায় NIA -এর দল বিভিন্ন জায়গায় গিয়ে জিজ্ঞাসাবাদ করছে।

০০০০০০০০০০০০০০০০০০০০০০

প্রচার সেরে বাড়ি ফেরার পথে দুর্ঘটনার কবলে পড়ল, কোচবিহার জেলার শীতলকুচি বিধানসভা কেন্দ্রের বিজেপি প্রার্থী সাবিত্রী বর্মনের গাড়ি। গতকাল রাত সাড়ে ১১ টা নাগাদ রাজ্য সড়কে, উল্টো দিক থেকে একটি ট্রাক সমানে চলে আসায় গাড়িটি নিয়ন্ত্রণ হারিয়ে রাস্তার ধারে নয়ানজুলিতে পড়ে যায়। দলীয় কর্মীরা তড়িঘড়ি গাড়ি থেকে বের করে মাথাভাঙা হাসপাতালে নিয়ে যায় তাঁকে। প্রাথমিক চিকিৎসার পর সাবিত্রী বর্মনকে বিহার এমজেএন মেডিকেল কলেজ হাসপাতালে পাঠানো হয়েছে।

০০০০০০০০০০০০০০০০০০০০০০

ঝাড়খণ্ড থেকে ফরাঙ্কায় আসার পথে একটি পিকআপ ভ্যানে অগ্ননওয়াড়ি কেন্দ্রের জন্য ২২০ বস্তা শিশু খাদ্য আটক করেছে ফরাঙ্কা থানার পুলিশ। গত শুক্রবার রাতে ফরাঙ্কার কেদারনাথ সেতুর কাছে গাড়িটি আটক করা হয়। এই ঘটনায় ঝাড়খণ্ডের বারহারোয়ার বাসিন্দা গাড়ির চালক আখতার শেখকে গ্রেফতার করা হয়েছে। পুলিশ সূত্রে খবর, শুক্রবার মাঝরাত নাগাদ ব্যারিকেড দিয়ে গাড়িটি থামায় তারা। তল্লাশি চালিয়ে গাড়ি থেকে মোট ২২০টি বস্তা উদ্ধার হয়। প্রতিটি বস্তার ওজন ছিল ১৩ কেজি ৮০০ গ্রাম। প্রতিটি বস্তায় লাল কালিতে ‘অগ্ননওয়াড়ি শিশু খাদ্য’ লেখা লেবেল লাগানো ছিল।

oooooooooooooooooooooooo

ভারতের তারালী সীমান্ত অবৈধভাবে পার হওয়ার সময় দুই বাংলাদেশী নাগরিক ও তাঁদের সাহায্যকারী দুই মহিলাকে গ্রেপ্তার করেছে পুলিশ। তাঁদেরবসিরহাট মহকুমা আদালতে পাঠানো হয়েছে। বিএসএফের ১৪৩ নম্বর ব্যাটালিয়নের জওয়ানরা তারালী সীমান্ত থেকে বাংলাদেশী নাগরিক শারমিন খাতুন ও কবিরুল ইসলামকে আটক করে, তারা যথাক্রমে যশোর ও সাতক্ষীরার বাসিন্দা। তাঁদের সঙ্গে একটি শিশুও ছিল।

প্রাথমিক জিজ্ঞাসাবাদের পর জানা গেছে, শামসুরা বিবি ও সালেহা সরদার নামে দুই স্থানীয় দালালের সাহায্যে তারা সীমান্ত পার করছিল। ভোটের তালিকা সংশোধন শেষ হতেই তাঁরা বাংলাদেশে ফেরার পরিকল্পনা করেছিলেন বলে প্রাথমিক অনুমান। এই ঘটনায় সব মিলিয়ে মোট ৪ জনকে গ্রেপ্তার করা হয়েছে।

oooooooooooooooooooooooo

পশ্চিম বর্ধমানের দুর্গাপুরের সিটি সেন্টার সংলগ্ন পন্ডিত রঘুনাথ মুর্মু সরণিতে বাড়ির রান্নার গ্যাসের পাইপলাইন থেকে গ্যাস লিক করে এলাকায় আতঙ্ক ছড়িয়েছে। স্থানীয় সূত্রে খবর, হঠাৎ এক বিকট শব্দের পর মাটির নীচে থেকে গ্যাস বের হতে থাকে। গ্যাস পাইপলাইনের ঠিকাদার জানান, দুর্গাপুর পুরসভার জলের পাইপলাইন মেরামতির কাজ চলাকালীন অসাবধানতাবশত গ্যাস লাইনে আঘাত লাগে এবং পাইপলাইন ফেটে যায়। এরপর সংশ্লিষ্ট কর্তৃপক্ষ দ্রুত ঘটনাস্থলে পৌঁছে কাজ শুরু করে। পাশাপাশি দমকল বাহিনী ও পুলিশও সেখানে উপস্থিত হয় এবং পরিস্থিতি নিয়ন্ত্রণে আনে।

এই ঘটনায় বড় কোনও ক্ষয়ক্ষতি বা হতাহতের ঘটনা ঘটেনি। সংশ্লিষ্ট কর্তৃপক্ষ-এর তরফে জানানো হয়েছে, খুব শীঘ্রই মেরামতির কাজ সম্পন্ন হবে এবং পরিস্থিতি স্বাভাবিক হয়ে যাবে।

০০০০০০০০০০০০০০০০০০০০০০

উত্তর ২৪ পরগনার দত্তপুকুর থানার চলতাবেড়িয়ায় এক ভয়াবহ অগ্নিকাণ্ডে অন্তত ১০টি কাঠের সরঞ্জাম তৈরির কারখানা ভস্মীভূত। গতকাল ভোররাতে দত্তপুকুর-২ নম্বর গ্রাম পঞ্চায়েত এলাকার চলতাবেড়িয়া নতুন রাস্তার মোড়ে আগুনের লেলিহান শিখা নজরে আসে। তারপর দ্রুত আগুন বিধ্বংসী রূপ নেয় এবং পার্শ্ববর্তী কারখানাগুলিতে ছড়িয়ে পড়ে। স্থানীয় বাসিন্দা ও দমকল কর্মীদের কয়েক ঘণ্টার প্রচেষ্টায় আগুন নিয়ন্ত্রণে আসে। তবে এই ঘটনায়। বিপুল ক্ষয়ক্ষতির আশঙ্কা করা হচ্ছে।

০০০০০০০০০০০০০০০০০০০০০০

অনুকূল বায়ু প্রবাহ এবং বাতাসে প্রচুর পরিমাণ জলীয় বাষ্প প্রবেশ করায় আজ থেকে দক্ষিণবঙ্গের বহু জেলাতেই দমকা হাওয়া এবং বজ্রবিদ্যুৎসহ বৃষ্টির সম্ভাবনা রয়েছে। পুরুলিয়া, পূর্ব ও পশ্চিম বর্ধমান, ঝাড়গ্রাম ও বীরভূম জেলায় ৪০ থেকে ৫০ কিলোমিটার বেগে ঝড়ো হাওয়া ও বর্জ্য বিদ্যুৎসহ বৃষ্টির পূর্বাভাস রয়েছে। কলকাতা ও পার্শ্ববর্তী এলাকাতেও আজ আকাশ আংশিক মেঘলা এবং কোথাও কোথাও বিক্ষিপ্তভাবে বৃষ্টির সম্ভাবনা রয়েছে। উত্তরবঙ্গের দার্জিলিং জলপাইগুড়ি কালিম্পং এবং আলিপুরদুয়ার জেলায় হালকা থেকে মাঝারি বৃষ্টি হবে। মঙ্গলবার থেকে সর্বত্রই বাড়বে বৃষ্টির পরিমাণ। তবে আজও দক্ষিণবঙ্গের জেলাগুলিতে কোথাও কোথাও গরম ও অস্বস্তিকর আবহাওয়া বজায় থাকবে। আলিপুরে আজ সকালে সর্বনিম্ন তাপমাত্রা রেকর্ড করা হয় ২৭ দশমিক ৭ ডিগ্রি সেলসিয়াস স্বাভাবিকের থেকে দুই দশমিক সাত ডিগ্রী বেশি।

০০০০০০০০০০০০০০০০০০০০০০

০০০০০০০০০০০০০০০০০০০০০০